

Vacanzas accompagnadas a Sent

Daspö l'utuon 2002 exista per umans impedits la pussibilità da passar a Sent vacanzas accompagnadas. Ils giasts da la famiglia Schnetzler Piguet derivan dal Grischun e da la Svizra Bassa.

(anr/fa) Davo avair impris a Turich la professiun da giardiniera ha fat Brigitte Schnetzler divers praticums in instituziuns socialas. Quatter ons ha ella lavurà a Cuaira sco chürunza i'l Wohnheim Gartenstrasse da l'ARGO. Lura ha ella fat la scolaziun da pedagoga sociala e lavurà ill'ufficina protetta Plankis. «Fingia pro meis prüm praticum n'haja badà chi nun es simpel per umans impedits d'ir in ün lö in vacanzas», s'algorda ella, «causa chi ston gnir accompagnats nun hana tanta tscherna sco nus». Uschè es nada pro ella l'idea da spordscher vacanzas accompagnadas per umans handicaps. «be alch pitschen, in ün rom individual». Ch'ella haja però miss d'vart quist impissamaint e pensà cha quai restarà ouramai ün sömme na realisabel, cuntinuesch'la. Quai s'ha müdà dal 1998, cun passar insembel cun sia famiglia il congedi da gravidanzaa in Engiadina.

Ragischs a Sent

Causa cha Peider Linsel, il tat da seis hom Jon Andrea Piguet, d'eira da quia ha decis il pèr da gnir a Sent. Dürant quel temp vaivna adüna darcheu amis in visita. «Nus vain badà ch'ins plascha d'avair giasts in chasa e

da tils ospitar, uschè cha meis sömme s'ha darcheu fat valair.» Il temp a Sent tils vaiva plaschü uschè bain chi'd es nat ün seguond sömme, quel da gnir cun lur trais figlias – ils schemblins Vera e Jana chi han 13 ons ed Annina chi ha cumanzà d'utuon la scoula – ad abitar a Sent. Cunquai cha la chasa veglia da la famiglia da seis hom nun es adattada per umans cun impediments hana decis da fabricar üna chasa. Cul sustegn da differentas instituziuns hana installà in chasa l'infrastructura necessaria, p.ex. ün muntass-chalas per sopchas cun roudas e'ls bogns adattats per quellas. D'utuon avant trais ons ha pudü bivgnantar la famiglia ils prüms giasts. Els han adüna be gruppas pitschnas, maximalmaing quatter persunas.

Giasts tuornan adüna darcheu

«Il prüm di eruina insembel cun nos giasts che ch'els fessan gugent», disch Brigitte Schnetzler, «insembel faina lura il program da l'eivna.» L'avantmezdi va ella insembel culs giasts a far las cumischiums. Davo güdan els a far il giantar. Cha güsta quels chi vivan in üna gronda chasa predschan da pudair contribuir alch pel past. La davomezdi fana excursiuns, sco p.ex. a San Jon ad ir in charrozza, culla pendicula sül Motta Naluns o eir üna visita i'l Bogn Engiadina Scuol. Dürant las excursiuns, ma eir cun ir in butia, daja blers contacts culla glieud chi reagischa da maniera fich positiva, declara Schnetzler. E cun quai chi impredan a cugnuescher uschè mincha jada darcheu otras persunas in cumün vegnan els regularmaing üna o duos jadas l'on in vacanzas a Sent. Ultra dals commembers da la famiglia Schnetzler Piguet accompagna minchatant eir la collavuratura Tina Janett-Vital da Tschlin lur giasts, e d'instà la praticanta Belinda Janij. Causa cha la famiglia realisescha lur sporta sün basa privata nu survegnna sustegn dal Chantun o da la Sgüranza d'invalidità. Perquai es gnüda fundada l'Uniu da promotuors chi vain presidiada da Regula Felix da Sent. Sco chi'd es gnü cuntshaint d'incuort survain la famiglia ingon eir il rechav da la gala da benefizi «ARGOmente» chi ha lö il principi da december a Cuaira. «Cur cha Ruedi Haltiner, il mainagestiu da l'ARGO, m'ha dit quai n'haja cret ch'eu m'insömgia», s'allegra Brigitte Schnetzler.

Ulteriuras infuormaziuns as survain suot: www.betreute-ferien.ch



Brigitte Schnetzler e Jon Andrea Piguet spordschan daspö trais ons vacanzas accompagnadas per glieud impedida a Sent – lur cudesch da giasts muossa il success ch'els han cun lur sporta. fotografia: F. Andry

Ingaschamaint in tuot il Grischun

L'ARGO, la fundaziun d'ufficinas protettas e dmuras per umans impedits, cun sez a Cuaira, dà lavur a var 530 collavuraturas e collavuratuors. Als 2 december 2005 organisescha l'ARGO a Cuaira, i'l Hotel Marsöl, üna sairada da gala nomnada «ARGOmente» cun divertimaint e discussiun. A quella pigliaran part divers prominents, tanter oter Frank Baumann, Marietta Tomaschett ed Andrea Zogg. Il rechav da quella saira vain miss a disposiziun quist on al proget «Vacanzas accompagnadas a Sent».